

JAMHURI YA MUUNGANO WA TANZANIA



WIZARA YA KILIMO

TAARIFA KWA VYOMBO VYA HABARI KUHUSU MAADHIMISHO YA SIKUKUU YA WAKULIMA (NANE NANE) KITAIFA MKOANI SIMIYU NA KATIKA KANDA SABA (7) KUANZIA TAREHE 01 - 08 AGOSTI, 2019

Ndugu Wananchi;

Awali ya yote napenda nichukue nafasi hii kuwakaribisha Wakulima, Wafugaji, Wavuvi, Wanaushirika na Wadau wote kwenye maadhimisho ya Sikukuu ya Nane Nane mwaka 2019. Maadhimisho ya Nane Nane mwaka huu wa 2019 ni ya 26 tangu kuanzishwa kwake.

Lengo la Sikukuu hii ni; kuwatambua na kuwaenzi Wadau Wakuu wa Sekta ya Kilimo ambao ni Wakulima, Wafugaji, Wavuvi, Wanaushirika, Wasindikaji wa mazao ya kilimo, mifugo, uvuvi na maliasili kwa mchango wao mkubwa wanaoutoa katika kuendeleza uchumi wa nchi yetu.

Ndugu Wananchi;

Mwaka huu wa 2019, sherehe hizi zinafanyika Kitaifa mjini Bariadi katika Viwanja vya maonesho ya kilimo Nyakabindi katika Mkoa wa Simiyu. Napenda kuwashukuru na kuupongeza Uongozi wa mikoa ya Simiyu, Shinyanga na Mara kwa juhudi zao za kufanikisha kuingiza uwanjani huduma za msingi ambazo ni maji na umeme.

Jukumu lilio mbele yetu sisi kama Serikali na Wadau wa Sekta Binafsi ni kuendeleza viwanja hivyo kwa kujenga mabanda ya maonesho ya kudumu na kuboresha huduma muhimu za kijamii ili tuwe maonesho endelevu yenye sura ya Kitaifa na Kimataifa.

Serikali kwa kushirikiana na Wadau mbalimbali, tumeendelea kuongeza na kuboresha viwanja vya maonesho katika Kanda mbalimbali hapa nchini, kwa sasa tuna viwanja nane (8) vya maonesho ya kilimo kama ifuatavyo: -

- 1) Themis (Arusha) Kanda ya Kaskazini inayohusisha mikoa ya Arusha, Kilimanjaro na Manyara;
- 2) Mwl. J.K.Nyerere (Morogoro) Kanda ya Mashariki ambayo mikoa yake ni Dar es Salaam, Pwani, Morogoro na Tanga;
- 3) John Mwakangale (Mbeya) Kanda ya Nyanda za Juu Kusini inayojumuisha mikoa ya Iringa, Mbeya, Ruvuma, Njombe, Katavi, Songwe na Rukwa;
- 4) Nzuguni (Dodoma) katika Kanda ya Kati yenye mikoa ya Dodoma na Singida;
- 5) Nyakabindi (Bariadi) Kanda ya Ziwa Mashariki yenye mikoa ya Simiyu, Shinyanga na Mara;
- 6) Nyamuhongolo (Mwanza) Kanda ya Ziwa Magharibi yenye mikoa ya Mwanza, Kagera na Geita;
- 7) Ngongo (Lindi) Kanda ya Kusini inayojumuisha mikoa ya Mtwara na Lindi na;
- 8) Fatma Mwasa (Tabora) Kanda ya Magharibi yenye mikoa ya Tabora na Kigoma;

Ndugu Wananchi;

Wakati wa sherehe hizi za Nane Nane, Wakulima, Wafugaji, Wavuvi, Wanaushirika na Wadau wengine katika Sekta za Kilimo; hupata fursa nzuri zaidi ya kuona na kujifunza mbinu na teknolojia sahihi za uzalishaji na usindikaji wa mazao ya kilimo, mifugo, uvuvi, maliasili na bidhaa nyinginezo kupitia Maonyesho ya Kilimo yanayoandaliwa. Aidha, kwa Wafanyabiashara hii ni fursa nzuri ya kutangaza bidhaa zao hususan pembejeo na zana mbalimbali za uzalishaji na usindikaji wa mazao ya kilimo, mifugo, uvuvi na maliasili.

Ndugu Wananchi;

Kaulimbiu ya sherehe za Nane Nane Mwaka huu ni "***Kilimo, Mifugo na Uvuvi kwa ukuaji wa Uchumi wa Nchi***".

Kaulimbiu hii imechaguliwa baada ya kutafakari kwa undani suala zima la ***Uchumi wa Viwanda*** unavyoweza kuchangia katika kukuza uchumi wa mtu mmoja mmoja, pato la Taifa na wakati huo huo kupambana na ***Umaskini***.

Ni ukweli ulio dhahili kuwa Kilimo ni Sekta kubwa na muhimu kwa maendeleo kutokana na mchango wake katika uchumi wa Taifa. Mfano katika mwaka 2017, Sekta ya Kilimo ilitoa ajira kwa Watanzania kwa asilimia 65.5, ikichangia asilimia 28.7 ya pato la Taifa. Sambamba na hilo Sekta ya Kilimo inachangia asilimia 65 ya malighafi za viwandani.

Takwimu zinaonesha kuwa katika robo ya kwanza ya mwaka 2018 ukuaji wa Sekta ya Kilimo ulifikia asilimia 7.1.

Kaulimbiu ya mwaka huu inahamasisha Wakulima, Wafugaji, Wavuvi na Wanaushirika kuleta mapinduzi katika Sekta za Kilimo kwa kuzalisha kwa tija ili kukuza uchumi wa Mkulima, Mfugaji, Mvuvi mmoja mmoja na Taifa kwa ujumla.

Ndugu Wananchi;

Mgeni Rasmi katika Siku ya Ufunguzi wa Maonyesho hayo Kitaifa, anatarajiwa kuwa Mhe. Mama Samia Suluhu Hassan, Makamu wa Rais wa Jamhuri ya Muungano wa Tanzania, wakati wa Maadhimisho yatakapokuwa yakiendelea. Tarehe 3 Agosti, 2019 tunatarajia kutembelewa na Mhe. Kassim Majaliwa Majaliwa (Mb.), Waziri Mkuu wa Jamhuri ya Muungano wa Tanzania na siku ya kilele cha maadhimisho hayo anatarajiwa kuwa Mhe. Dkt. John Pombe Joseph Magufuli, Rais wa Jamhuri ya Muungano wa Tanzania.

Kwa taarifa hii, napenda kutoa wito kwa Wadau wote wa Sekta za Kilimo, Ufugaji, Uvuvi, Ushirika, Maliasili na Mazingira pamoja na Wananchi wote kushiriki kwa dhati katika maonesho ya mwaka huu.

Napenda kuwahakikishia kuwa mahudhurio yenu katika maonyesho hayo yatakuwa ya manufaa makubwa kwani; mtajionea mbinu za kuboresha shughuli zenu za kilimo, ufugaji, uvuvi, ushirika na masoko ya mazao ya kilimo, mifugo na uvuvi. Kwa Wanunuzi na Wafanyabiashara watapata fursa ya kutangaza bidhaa zao.

Natoa wito kwa Wananchi na Wadau wote kushiriki kikamilifu na kuhudhuria kwa wingi maonesho hayo kuanzia tarehe 1 hadi 8 Agosti, 2019.



Japhet Ngailonga Hasunga (Mb)
WAZIRI WA KILIMO

26/06/2019

N.B. Kwa mawasiliano kuhusu ushiriki katika Maadhimisho ya Sikukuu ya Wakulima, Nane Nane, Kitaifa (2019).

Piga simu kwa: -

Mkurugenzi Idara ya Maendeleo ya Mazao – Wizara ya Kilimo

(Bw. Nyasebwa Enock Chimagu- +255 754 475 502)

Katibu wa Kamati ya Maandalizi – Wizara ya Kilimo

(Bw. Jamhuri Masha Amin + 255 787280252)